

Савол	Жавоб
<i>Нима учун мен таътилга жадвал бўйича чиқишим керак?</i>	Сиз ўзингизга қулай саналарда таътилга чиқишингиз учун компания таътиллار жадвалини тузишда доим манфаатларингизни инобатга олишга ҳаракат қилади. Шу сабабли сиз ҳар йили раҳбарият билан келгуси йил учун таътил кунларини белгилайсиз. Жадвал тасдиқлангач, унга ходимлар ҳам, иш берувчи ҳам риоя қилиши шарт. Бу МК 228-моддаси талабидир
<i>Ўзимга қулай саналарда таътил олсам бўладими?</i>	Ҳа, агар қонунга кўра ўзингизга қулай вақтда таътил олиш ҳуқуқига эга бўлсангиз. Масалан, агар фарзандингиз 14 ёшга тўлмаган бўлса (ногиронлиги бўлган бола учун – 16 ёшгача). Ўзингизга қулай вақтда таътилга чиқиш ҳуқуқингиз бор-йўқлигини аниқлаш учун кадрлар бўлимига мурожаат қилинг. Бошқа ҳолларда таътил саналари келишиб олинishi лозим
<i>Жадвал тасдиқлангандан кейин таътил саналарини қандай ўзгартирса бўлади?</i>	Таътилни бошқа муддатга кўчириш фақат иш берувчи билан келишув асосида амалга оширилади. Истисно ҳолат: агар қонунга кўра сиз ўзингизга қулай вақтда таътилга чиқиш ҳуқуқига эга бўлсангиз. Таътилни кўчириш учун раҳбарият билан келишинг, сўнг кадрлар бўлимига таътилни кўчириш тўғрисида ариза ёзиб топширинг. Агар иш берувчи розилик берса, сизни таътилни кўчириш тўғрисидаги буйруқ билан танишишга таклиф қилишади
<i>Таътилга чиқмасдан, унинг пулини олса бўладими?</i>	Ҳа, агар таътил 21 кундан ортиқ бўлса ва гап унинг 21 кундан ошган қисми учун компенсация олиш ҳақида кетаётган бўлса. Шунинг ёдда тутингки, ҳомиладорлар, вояга етмаганлар ва зарарли меҳнат шароитларида ишлайдиган ходимларнинг таътилини пул компенсацияси билан алмаштириш мумкин эмас
<i>Келгуси йил учун таътилни аванс сифатида олса бўладими?</i>	Ҳа, мумкин, фақат раҳбарият қарши бўлмаса. Иш берувчи ходимларга ҳар йил – ҳар бир иш йили учун таътил бериши шарт. Лекин қонунчилик иш берувчини таътил берилаётган иш йили бошланишидан олдин таътил беришга мажбурламайди
<i>Тўлиқ бўлмаган иш ҳафтаси тартиби таътилга таъсир қиладими?</i>	Йўқ. Йиллик таътил кунлари сони сизнинг тўлиқ иш ҳафтасида ишлашингиз ёки ишламаслигингизга боғлиқ эмас. Ҳар қандай ҳолатда ҳам сизга йилига камида 21 календарь кун таътил берилиши керак
<i>Нима учун менга таътилдаги якшанба учун ҳақ тўланмайди?</i>	Таътил пулини тўлашда якшанба куни ҳисобга олинмайди. Бу МК 233-моддаси талаби
<i>Таътилга тўғри келган байрам кунлари учун ҳақ тўланадими?</i>	Йўқ. Ишланмайдиган байрам кунлари йиллик меҳнат таътили муддатига киритилмайди

<i>Қўшимча дам олиш кунлари таътилга қандай таъсир қилади?</i>	Қўшимча дам олиш кунлари меҳнат таътили давомийлигига киритилади ҳамда улар учун ҳақ умумий тартибда тўланади
<i>Таътилга чиқдимۇ қаттиқ шомоллаб, иситмалаб ётиб қолдим. Бу кунларим куйиб кетадими?</i>	Йўқ, куйиб кетмайди. Агар касал бўлиб, расмий касаллик варақаси очтирган бўлсангиз, таътилингиз касаллик кунлари сонига узайтирилади ёки (ўз танловингизга кўра) бошқа муддатга кўчирилади. Бунинг учун меҳнатга лаёқатсизлик варақасини тақдим этишингиз керак
<i>Таътил пайтида касаллик варақаси очтирдим. Тўланган таътил пуллари нима бўлади?</i>	Агар таътилни касаллик кунлари ҳисобига узайтирсангиз, таътил пуллари қайта ҳисобланмайди. Агар таътилнинг фойдаланилмаган қисмини бошқа вақтга кўчирсангиз, бухгалтер таътил пули миқдорини қайта ҳисоб-китоб қилади. Касал бўлган кунларингиз учун эса сизга касаллик нафақаси тўланади
<i>Компанияга ишга кирганимга кўп бўлмади. Қачон таътилга чиқа оламан?</i>	Ходим биринчи йиллик меҳнат таътилидан фойдаланиш ҳуқуқига олти ой ишлаганидан кейин эга бўлади. Бироқ раҳбарият билан келишган ҳолда таътилга бундан олдин ҳам чиқиш мумкин
<i>Мени таътилга чиқишга мажбурлашлари мумкинми?</i>	Ҳа, лекин фақатгина таътиллар жадвалига мувофиқ. Таътиллар жадвали ходимлар учун ҳам, иш берувчилар учун ҳам мажбурийдир. Мазкур тартиб фақат томонларнинг ўзаро келишуви орқали ўзгартирилиши мумкин
<i>Таътил пайтида касал бўлиб қолдим. Таътилни узайтирсам бўладими?</i>	Ҳа, сиз таътилни касаллик кунлари муддатига узайтиришга ёки уни бошқа вақтга кўчиришга ҳақлисиз. Таътилни бошқа вақтга кўчириш учун ариза ёзинг. Янги таътил даврини раҳбарият билан келишиш зарур
<i>Меҳнат таътилига чиққанымдан сўнг, эртаси куни таътилдан чақириб олинишимни расмийлаштиришим мумкинми?</i>	Ҳа, раҳбар сизни йиллик меҳнат таътилидан чақириб олиши мумкин, бироқ фақат ўз розилингиз билан. Таътилнинг фойдаланилмаган қисми томонларнинг келишувига биноан бошқа муддатга кўчирилади. Аммо бу ҳолда бухгалтерия сизга амалда фойдаланилган таътил кунларини ҳисобга олган ҳолда таътил пулини қайта ҳисоблаб беради
<i>Ишдан бўшаганимда ўтган йиллардаги таътиллар учун компенсация пулини оламанми?</i>	Ҳа, ишдан бўшаш вақтида сизга барча фойдаланилмаган меҳнат таътиллари учун пул компенсацияси тўланади. Ўтган йиллардаги фойдаланилмаган таътил кунлари куйиб кетмайди
<i>Таътилнинг қайси қисмини кейинги йилга кўчириш мумкин?</i>	Таътилнинг 14 календарь кундан ошадиган қисмини кейинги иш йилига ўтказиш мумкин. Бунда кўчирилган таътил кунларидан кейинги иш йили яқунлангунга қадар фойдаланиш шарт
<i>Таътилга чиқиб, сўнг ишдан бўшасам бўладими?</i>	Ҳа. Иш берувчи билан келишувга биноан, меҳнат шартномасини кейинчалик бекор қилиш шарт билан

	йиллик меҳнат таътилидан фойдаланишингиз мумкин. Бу ҳолда таътилнинг охири куни ишнинг сўнгги куни деб ҳисобланади
<i>Мен таътилга чиқдим. Таътил пайтида мени ўқишга чақирди. Таътилни узайтирсам бўладими?</i>	Ҳа. Агар сиз йиллик меҳнат таътили даврида ўқув таътилига чиққан бўлсангиз, йиллик таътилни узайтириш ёки унинг фойдаланилмаган қисмини ўқув таътили кунлари сонига мувофиқ бошқа муддатга кўчириш мумкин
<i>Турмуш ўртоғимнинг туғруқ кунларида таътил олсам бўладими?</i>	Ҳа, сиз турмуш ўртоғингизнинг ҳомиладорлик ва туғиш таътили даврида таътил расмийлаштиришга ҳақлисиз. Асос – МК 228-моддаси 5-қисми
<i>Мен ўриндошлик асосида ишлайман. Асосий ишимдан таътилга юборишди – бу ердан ҳам таътилга чиқа оламанми?</i>	Ҳа. Бунинг учун асосий иш жойингиздан таътилда эканлигингизни тасдиқловчи маълумотнома келтиришингиз керак
<i>Агар асосий иш жойидаги таътил ўриндошлик асосидаги иш жойидаги таътил кунларидан кўп бўлса, нима қилиш керак?</i>	Агар асосий иш жойидаги таътил давомийлиги ўриндошлик асосидаги иш жойидаги таътилдан кўпроқ бўлса, аризангизга биноан сизга таътиллар ўртасидаги фарқли кунлар учун иш ҳақи сақланмаган ҳолда таътил берилади
<i>Ҳомиладорлик ва туғиш таътилидан олдин таътилга чиқа оламанми?</i>	Ҳа. Сиз йиллик меҳнат таътилидан бевосита ҳомиладорлик ва туғиш таътилидан олдин ёки у тугаганидан сўнг дарҳол фойдаланиш ҳуқуқига эгасиз